



Na osnovu člana 15. Zakona o Upravi za indirektno oporezivanje ("Službeni glasnik BiH", broj 89/05) i člana 61. stav 2. Zakona o upravi ("Službeni glasnik BiH", broj 32/02), direktor Uprave za indirektno oporezivanje d o n o s i

U P U T S T V O **O CARINSKOM POSTUPKU VANJSKE OBRADJE**

GLAVA I. OPĆE ODREDBE

Član 1. **(Predmet)**

Ovim Uputstvom bliže se propisuje način provedbe carinskog postupka vanjske obrade (u daljnjem tekstu: vanjska obrada), kao postupka s ekonomskim učinkom, koji omogućava privremeni izvoz bh. robe iz carinskog područja Bosne i Hercegovine (u daljnjem tekstu: BiH) u svrhu podvrgavanja procesima obrade i nakon toga ponovni uvoz u carinsko područje BiH kompenzirajućih proizvoda nastalih u tim procesima, uz potpuno ili djelimično oslobađanje od plaćanja uvoznih dažbina.

Član 2. **(Pravni osnov)**

Vanjska obrada regulirana je:

- a) odredbama člana 81. do 87., 120. i 141. do 156. Zakona o carinskoj politici Bosne i Hercegovine ("Službeni glasnik BiH", broj 57/04, 51/06 i 93/08), (u daljnjem tekstu: Zakon),
- b) odredbama člana 299. do 320. i 382. do 390. Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", broj 63a/04, 60/06 i 57/08), (u daljnjem tekstu: Odluka), što uključuje i Priloge Odluke propisane tim odredbama i
- c) odredbama ovog Uputstva.

Član 3. **(Definicije)**

U primjeni ovog Uputstva, a u skladu s članom 141. Zakona i članom 299. Odluke, pojmovi imaju sljedeće značenje:

- a) "odobrenje" - odobrenje nadležnog carinskog organa za vanjsku obradu,
- b) "imalac odobrenja" - lice kojem je izdato odobrenje za vanjsku obradu,
- c) "bh. roba" (bosanskohercegovačka roba) - roba iz člana 4. tačka (12) Zakona,
- d) "nadzorni carinski ured" - carinski ured naveden u odobrenju kao ovlaštenu ured za vršenje nadzora u vanjskoj obradi,
- e) "prijavni carinski ured" - carinski ured naveden u odobrenju kao ovlaštenu ured za prihvatanje carinske prijave kojom se roba prijavljuje za vanjsku obradu,

- f) "otpusni carinski ured" - carinski ured naveden u odobrenju kao ovlaštenu ured za prihvatanje carinske prijave za stavljanje robe u slobodan promet nakon ponovnog uvoza (za razduživanje vanjske obrade),
- g) "glavni kompenzirajući proizvodi" - glavni proizvodi koji nastanu u procesima obrade u okviru vanjske obrade,
- h) "sekundarni kompenzirajući proizvodi" - kompenzirajući proizvodi koji se razlikuju od glavnog kompenzirajućeg proizvoda, a koji predstavljaju neophodni nus proizvod u odobrenoj vanjskoj obradi i navedeni su u odobrenju,
- i) "rok za razduživanje vanjske obrade" - rok do kojeg se robi ili kompenzirajućim proizvodima mora odrediti novo carinski odobreno postupanje ili upotreba, uključujući i vrijeme za dobivanje potpunog ili djelimičnog oslobađanja od plaćanja uvoznih dažbina za stavljanje u slobodan promet nakon vanjske obrade,
- j) "roba za privremeni izvoz" - bh. roba koja se stavlja u vanjsku obradu,
- k) "normativ proizvodnje" - količina i procenat kompenzirajućih proizvoda koji se dobiju obradom određene količine privremeno izvezeno robe u okviru vanjske obrade,
- l) "proces obrade" - prerada robe, uključujući njeno podizanje, sklapanje i montiranje na drugu robu, obrada robe i popravak robe, uključujući njeno obnavljanje i osposobljavanje.

GLAVA II. ZAHTJEV I ODOBRENJE

Član 4.

(Podnošenje zahtjeva u pisanom obliku)

(1) Zahtjev za izdavanje odobrenja za vanjsku obradu podnosi se Odsjeku za carine pri regionalnom centru nadležnom prema mjestu sjedišta podnosioca zahtjeva, na obrascu propisanom u Prilogu 43. Odluke, u svemu potpunog u skladu s Objašnjenjem datim u tom prilogu. Podaci u zahtjevu moraju biti dovoljni, razumljivi i tačni, posebno u pogledu robe za privremeni izvoz, kompenzirajućih proizvoda i normativa proizvodnje, kako bi se moglo provjeriti da li su ispunjeni propisani uvjeti za odobravanje vanjske obrade.

(2) Zahtjev iz stava (1) ovog člana, taksiran propisanom administrativnom taksom, s dokumentacijom čije je podnošenje potrebno za donošenje odobrenja (izvod iz sudskog registra o obavljanju djelatnosti, ugovor, normativ proizvodnje i drugi dokumenti o podacima koji su navedeni u zahtjevu), podnose se u dva primjerka, od kojih jedan primjerak ostaje u spisu kod izdavaoca odobrenja, a drugi primjerak se dostavlja nadzornom carinskom uredu s odobrenjem.

Član 5.

(Carinska prijava kao zahtjev i odobrenje)

(1) Zahtjev za vanjsku obradu, u skladu s odredbama člana 300. stav 3. tačka (d) Odluke, podnosi se pomoću carinske prijave:

- a) za vanjsku obradu ako se vanjska obrada odnosi na popravak, uključujući i postupak standardnog sistema razmjene bez prethodnog uvoza,
- b) za puštanje u slobodan promet nakon vanjske obrade korištenjem standardnog sistema razmjene s prethodnim uvozom,
- c) za puštanje u slobodan promet nakon vanjske obrade korištenjem standardnog sistema razmjene bez prethodnog uvoza, gdje postojeće odobrenje ne pokriva takav sistem i nadležni carinski ured dozvoljava njegovu modifikaciju,
- d) za puštanje u slobodan promet nakon vanjske obrade ako se radnje obrade odnose na robu nekomercijalne prirode.

(2) U slučajevima iz stava (1) ovog člana, podnošenje carinske prijave smatra se podnošenjem zahtjeva, a prihvatanje carinske prijave od strane carinskog ureda odobrenjem. Shodno članu 301. tačka (b) treća alineja Odluke, carinska prijava podnosi se carinskom uredu nadležnom za mjesto gdje se nalazi roba koju treba prijaviti za privremeni izvoz radi opravke u okviru vanjske obrade.

(3) Uz carinsku prijavu iz stava (2) ovog člana, bez odstupanja od člana 127. Odluke, deklarant će priložiti i dokument s podacima iz člana 302. stav 2. Odluke, sačinjen na obrascu iz Priloga 1. ovog Uputstva, osim ako se takvi podaci za postupak smatraju nepotrebnim ili se mogu unijeti u carinsku prijavu, koji dokument ne podliježe naplati administrativne takse.

(4) Carinski ured iz stava (2) ovog člana, odobreni rok za razduživanje vanjske obrade, tj. rok za ponovni uvoz i puštanje u slobodan promet kompenzirajućih proizvoda, upisuje u u polju D/J (peti red) carinske prijave, kao i u dokumentu iz stava (3) ovog člana ako je priložen.

(5) Carinska prijava kojom se razdužuje vanjska obrada u slučajevima iz stava (1) ovog člana, podnosi se carinskom uredu kod kojeg je taj postupak i započet, koji ured se smatra i nadzorni carinski ured u tom postupku.

Član 6.

(Uvjeti za odobravanje vanjske obrade)

(1) Vanjska obrada može se odobriti licu koje organizira vršenje procesa obrade.

(2) Odobrenje za vanjsku obradu bh. robe daje se samo:

- a) licima koja su registrirana u BiH i kod Uprave za indirektno oporezivanje po osnovu obavljanja vanjskotrgovinskog poslovanja,
- b) kada se smatra da će biti moguće da se utvrdi da su kompenzirajući proizvodi nastali obradom robe za privremeni izvoz i
- c) kada odobrenje za korištenje vanjske obrade ozbiljnije ne šteti suštinskim interesima proizvođača iz BiH (ekonomski uvjeti). Smatra se da bitni interesi bh. proizvođača nisu ozbiljno ugroženi, osim kada postoje indikacije u suprotno. Ekonomske uvjete provjerava Vanjskotrgovinska komora BiH, odnosno utvrđuje postoje li u BiH uvjeti za proizvodnju, odnosno provedbu određenih radnji i postupaka nad robom radi kojih se zahtjeva obavljanje određenih radnji u inostranstvu u okviru vanjske obrade. Ocjenjujući uvjete, kapacitete i mogućnosti proizvodnje, te moguće troškove proizvodnje, Vanjskotrgovinska komora BiH će utvrditi da li su ili ne ispunjeni ekonomski uvjeti za odobravanje vanjske obrade, nakon čega, podnosiocu zahtjeva izdaje mišljenje ili suglasnost o ispunjenosti ekonomskih uvjeta.

(3) Iako je vanjska obrada načelno ograničena na bh. robu, prema članu 120. Zakona, dopušteno je da se roba koja nije bh. roba a koja se nalazi u postupku unutrašnje obrade, privremeno izveze u svrhu daljnje prerade van carinskog područja BiH, što je pobliže regulirano propisima o carinskom postupku unutrašnje obrade.

Član 7.

(Izdavanje odobrenja u pisanom obliku)

(1) Odobrenje za vanjsku obradu, osim u slučajevima iz člana 5. ovog Uputstva, izdaje carinski organ iz člana 4. stav (1) ovog Uputstva, na obrascu propisanom u Prilogu 43 Odluke, u roku od 30 dana od dana podnošenja zahtjeva ili od dana prijema svakog od carinskog organa traženog nedostajućeg ili dodatnog podatka ili dokumenta.

(2) U odobrenju se odlučuje o svim elementima zahtjeva važnim za odvijanje vanjske obrade. U odobrenju se navode prijavni, otpusni i nadzorni carinski ured. Odobrenje mora sadržavati sve podatke koji se odnose na nosioca odobrenja, opis robe koja se privremeno izvozi i opis kompenzirajućih

proizvoda, planirane postupke vanjske obrade, očekivani normativ, odnosno odobrenu metodu njegovog utvrđivanja, mjere identifikacije, rok važenja odobrenja, rok za razduživanje vanjske obrade i sve druge podatke neophodne za provedbu vanjske obrade. Odobrenje se, pored elemenata sadržanih u propisanom obrascu, može dopuniti i dodatnom klauzulom o dužnosti imaoaca odobrenja o poštivanju svih propisa i ispunjavanju obaveza koje proističu iz odobrenog postupka, kao i drugim neophodnim klauzulama.

(3) Odobrenje za vanjsku obradu stupa na snagu danom izdavanja ili bilo kojeg kasnijeg datuma navedenog u odobrenju.

(4) Odobrenje za vanjsku obradu se može izmijeniti ili dopuniti po zahtjevu imaoaca odobrenja, uz prilaganje potrebne dokumentacije i navođenje opravdanih razloga, o čemu odlučuje carinski organ iz člana 4. stav (1) ovog Uputstva.

Član 8. (Retroaktivno izdavanje odobrenja)

(1) U skladu s članom 306. Odluke, za vanjsku obradu može se izdati retroaktivno odobrenje. Bez odstupanja od stava (2) i (3) ovog člana, retroaktivno odobrenje stupa na snagu najranije na dan podnošenja zahtjeva.

(2) Ako se zahtjev odnosi na produženje postojećeg odobrenja za istu vrstu radnje i istu vrstu robe, odobrenje se može izdati uz retroaktivno važenje od dana kada je originalno (postojeće) odobrenje isteklo.

(3) U izuzetnim slučajevima, retroaktivno važenje odobrenja se može i dalje produžiti, ali ne duže od jedne godine prije datuma podnošenja zahtjeva, pod uvjetom da postoji dokazana ekonomska potreba i ako:

- a) zahtjev nije u vezi s pokušajem prijave ili očiglednim nemarom,
- b) rok važenja odobrenja od tri godine nije prekoračen,
- c) knjigovodstvo podnosioca zahtjeva potvrđuje da se svi uvjeti vanjske obrade mogu smatrati zadovoljenim i da se, kada je to primjereno, roba može identificirati u datom periodu, te da to knjigovodstvo omogućava kontrolu vanjske obrade i
- d) se radnje i postupci potrebni za reguliranje situacije u vezi s robom mogu izvršiti, uključujući, kada je to neophodno i poništenje carinske prijave.

Član 9. (Slučajevi u kojima se ne dozvoljava vanjska obrada)

Vanjska obrada, shodno članu 142. Zakona, ne može se odobriti za slijedeću bh. robu:

- a) čiji izvoz dovodi do vraćanja ili odustajanja od naplate uvoznih dažbina (prema članu 80. Zakona, roba za koju su vraćene uvozne dažbine ili se odustalo od njihove naplate gubi carinski status robe iz BiH),
- b) koja je prije izvoza, bila stavljena u slobodan promet uz potpuno oslobađanje od plaćanja uvoznih dažbina na osnovu krajnje upotrebe, onoliko dugo dok uvjeti za davanje takvog oslobađanja nastavljaju da se primjenjuju.

Član 10. (Identifikacija robe)

(1) Postupak vanjske obrade može se odobriti samo ukoliko nadležni carinski organ, u svakom konkretnom slučaju, na temelju podnesenih isprava ocijeni da postoji mogućnost nadzora vanjske obrade i njene provjere. U svrhu identifikacije, u odobrenju, se određuju sredstva i metode kojima će se utvrditi da li su kompenzirajući proizvodi proizvedeni od privremeno izvezene robe.

(2) U svrhe identifikacije robe, ovisno o situaciji, mogu se koristiti slijedeće mjere:

- a) navod ili opis posebnih oznaka ili proizvodnih brojeva,
- b) stavljanje plombi, pečata, naljepnica ili drugih posebnih oznaka prepoznavanja,
- c) uzimanje uzoraka, prospekata, fotografija, ilustracija ili tehnički opis,
- d) vršenje analize,
- e) provjera knjigovodstvene evidencije,
- f) provjera prateće dokumentacije u vezi s odobrenom vanjskom obradom (ugovori, prepiske, predračuni, faktura i dr.), koja jasno pokazuje da kompenzirajući proizvodi treba da budu proizvedeni od privremeno izvezeno robe.

3) Kada, zbog karaktera radnje obrade, nije moguće utvrditi da li su kompenzirajući proizvodi nastali od robe namijenjene za privremeni izvoz, odobrenje se u opravdanim slučajevima, shodno odredbi člana 383. tačka 2. Odluke, može izdati pod uvjetom da podnosilac zahtjeva ponudi dovoljne garancije da roba koja se koristi u radnjama obrade dijeli isti osmociфreni broj Carinske tarife BiH, ima isti komercijalni kvalitet i tehničke karakteristike kao i roba za privremeni izvoz. U odobrenju se propisuju uvjeti za korištenje vanjske obrade.

Član 11. **(Mjere trgovinske politike)**

(1) Mjere trgovinske politike predviđene propisima BiH za stavljanje robe u slobodan promet, shodno članu 307. stav 4. Odluke, ne primjenjuju se na kompenzirajuće proizvode ponovno uvezene i stavljene u slobodan promet nakon vanjske obrade:

- a) koji su zadržali nepreferencijalno porijeklo BiH u smislu člana 20. i 21. Zakona,
- b) koji su prošli popravku, uključujući i standardni sistem razmjene,
- c) nakon dopunskih radnji vanjske obrade vezano uz postupak unutrašnje obrade u skladu s članom 120. Zakona.

(2) Na privremeni izvoz bh. robe za vanjsku obradu, u skladu s članom 141. stav 2. Zakona, primjenjuju se izvozne carine, mjere trgovinske politike i druge radnje i postupci za istup robe iz carinskog područja BiH. Ukoliko je za određenu robu uvedena izvozna carina, ista će se obračunati i naplatiti i kod privremenog izvoza bh. robe u okviru vanjske obrade. Naplaćena carina se ne vraća.

Član 12. **(Rok važenja odobrenja)**

(1) U skladu s potrebama i specifičnostima procesa obrade, u odobrenju za vanjsku obradu iz člana 7. ovog Uputstva određuje se rok važenja odobrenja, koji ne može biti duži od tri godine.

(2) Rok iz stava (1) ovog člana, računa se od dana stupanja na snagu odobrenja ili bilo kojeg kasnijeg datuma navedenog u odobrenju, s tim da se carinska prijava kojom se roba prijavljuje za postupak vanjske obrade, ne može prihvatiti, niti se roba može privremeno izvesti, prije nego što odobrenje stupi na snagu.

(3) Izuzetno, na zahtjev imaoца odobrenja, rok od tri godine može se produžiti, kada za to postoje posebni opravdani i obrazloženi razlozi.

Član 13. **(Rok za razduživanje vanjske obrade)**

(1) U odobrenju će biti određen i rok za razduživanje vanjske obrade, tj. rok u kojem kompenzirajući proizvodi trebaju da budu ponovno uvezeni i stavljeni u slobodan promet, uzimajući u obzir dužinu procesa obrade, količinu privremeno izvezeno robe, vrijeme potrebno za transport privremeno izvezeno robe i kompenzirajućih proizvoda. Rok za razduživanje može biti duži od roka važenja odobrenja (npr. odobrenje važi do 31.12.2008. godine, roba je stavljena u vanjsku obradu po carinskoj prijavi EX 2 dana 01.11.2008. godine sa rokom razduživanja od 4 mjeseca, rok za razduživanje te prijave je do 01.03.2009. godine).

(2) Rok za razduživanje počinje teći od dana prihvatanja carinske prijave po kojoj je roba stavljena u vanjsku obradu. Taj rok, prijavni carinski ured, unosi u polje D/J (peti red) carinske prijave kojom je roba prijavljena za vanjsku obradu.

Primjer:

Firma "A" po odobrenju za vanjsku obradu vrši privremeni izvoz repromaterijala (tkanina, konac, podstava, dugmad i rajferšlus) za proizvodnju kompenzirajućeg prizvoda (suknje), po kojem je odobren rok za razduživanje od 4 mjeseca. Izvoz je izvršen i to:

- po EX 2 od 01.11.2008. izvezena je tkanina i konac,
- po EX 2 od 05.12.2008. izvezeni su podstava, dugmad i rajferšlus.

Rok za razduživanje carinske prijave EX 2 od 01.11.2008. godine je do 01.03 2009. godine, a carinske prijave EX 2 od 05.12.2008. godine je do 05.04.2009. godine.

(3) Kada to okolnosti nalažu, rok iz stava (2) ovog člana, nadzorni carinski ured, na osnovu obrazloženog zahtjeva imaoca odobrenja, može produžiti u razumnim granicama. Taj rok, nadzorni carinski ured, može produžiti u razumnim granicama čak i ako je prvobitni rok istekao, ako to nalažu posebne okolnosti (npr. kvar mašine ili neki drugi zastoj u proizvodnji, problemi u transportu i dr.), s tim da se u takvim slučajevima zahtjev za produženje roka za razduživanje vanjske obrade može podnijeti najksanije u roku od osam dana po prestanku tih okolnosti. Zahtjev, uz koji se prilaže carinska prijava po kojoj je stavljena u vanjsku obradu roba za koju se traži produženje roka, treba da sadrži:

- a) opravdane razloge za produženje roka (npr. odložena isporuka kompenzirajućih proizvoda zbog problema tehničke prirode - kvar mašine ili drugi zastoji u procesu proizvodnje, problemi sa isporukom zbog političke i ekonomske situacije, problemi u transpostu i dr.), o čemu, uz zahtjev, treba priložiti dokaz,
- b) period produženja,
- c) količinu privremeno izvezene robe koja je preostala za razduživanje.

(4) Odluku o odobravanju zahtjeva iz stava (3) ovog člana, nadzorni carinski ured donosi u skraćenom postupku, u vidu zabilješke na zahtjevu, a odobreni rok produženja upisuje u polje D/J (peti red) na primjerku priložene carinske prijave za koju je odobreno produženje roka ponovnog uvoza, koju nakon toga vraća nosiocu odobrenja, kao i na primjerku prijave koja se nalazi kod tog ureda.

Član 14. **(Evidencija o robi)**

(1) Podnosilac zahtjeva za izdavanje odobrenja za vanjsku obradu navodi mjesto gdje će voditi evidenciju i uz zahtjev prilaže izgled i sadržaj evidencije, dok se u odobrenju imaocu određuje obaveza i način vođenja evidencije o robi stavljenoj u vanjsku obradu, koja treba da sadrži podatke iz člana 314. Odluke i omogući nadzor nad postupkom.

(2) Donosilac odobrenja može da odustane od zahtjeva za nekim od podataka iz člana 314. Odluke kada to ne utiče na kontrolu vanjske obrade ili prihvati kao evidenciju za vanjsku obradu evidenciju imaoca odobrenja koja sadrži sve potrebne podatke i tehničke detalje na bilo kojem mediju ili evidenciju koju on vodi za poslovne svrhe, a koja carinskim organima omogućava nadzor i kontrolu vanjske obrade.

(3) Evidencija mora biti dostupna nadzornom carinskom uredu (a po potrebi i drugom kontrolnom carinskom organu), koji prati i vrši kontrolu pravilnosti provedbe vanjske obrade. U evidenciji imaoca odobrenja moraju se nalaziti sve carinske prijave o ulasku robe u vanjsku obradu i o razduživanju tog postupka.

Član 15.
(Normativ proizvodnje i metod za izračunavanje)

(1) U odobrenju će biti određen normativ proizvodnje ili kada je to potrebno, metod za određivanje takvog normativa. Normativ, u najvećoj mjeri, treba biti određen na osnovu stvarnih okolnosti i podataka o proizvodnim radnjama koje se obavljaju ili se trebaju obavljati na privremeno izvezenoj robi, ili kada ti podaci nisu dostupni na osnovu podataka koji se odnose na radnje iste vrste. Normativ ili metodu za određivanje normativa nadležni carinski organ može provjeravati naknadno.

(2) U izuzetnim slučajevima, u proizvodnji u kojoj na početku vanjske obrade nije moguće precizno utvrditi normativ utroška materijala, u odobrenju će se naznačiti predloženi (privremeni) normativ, s tim da je imalac odobrenja obavezan, prije prvog ponovnog uvoza kompenzirajućih proizvoda, dostaviti nadzornom carinskom uredu stvarni normativ utroška materijala, a jedan primjerak i izdavaocu odobrenja. Na osnovu stvarnog normativa vrši se obračun uvoznih dažbina kod puštanja kompenzirajućih proizvoda u slobodan promet.

(3) Omjer robe privremeno izvezene i ugrađene u kompenzirajuće proizvode izračunava se u cilju:

- a) utvrđivanja iznosa uvoznih dažbina koji treba oduzeti kada nastane carinski dug i
- b) primjene mjera trgovinske politike.

(4) U slučajevima kada se svi kompenzirajući proizvodi dobiveni u vanjskoj obradi ne stavljaju istovremeno u slobodan promet, omjer privremeno izvezene robe ugrađene u dobivenim kompenzirajućim proizvodima, u skladu s članom 316. Odluke, izračunava se uz primjenu kvantitativne (količinske) metode ili vrijednosne metode ili bilo kojom drugom metodom koja daje slične rezultate. U cilju ovih obračuna, kompenzirajući proizvodi uključuju obrađene proizvode ili poluproizvode.

(5) Kvantitativna metoda (ljestvica) je način izračunavanja udjela privremeno izvezene robe u različitim kompenzirajućim proizvodima, na osnovu količine takve robe. Ova metoda primjenjuje se kada:

- a) samo jedna vrsta kompenzirajućeg proizvoda nastane radnjama obrade; u tom slučaju količina privremeno izvezene robe koja se smatra da je prisutna u količini kompenzirajućih proizvoda za koje je nastao carinski dug izračunava se na način da se ukupna količina svake vrste privremeno izvezene robe pomnoži sa koeficijentom koji se dobije iz odnosa količine kompenzirajućih proizvoda za koje je carinski dug nastao i ukupne količine kompenzirajućih proizvoda,
- b) nekoliko vrsta kompenzirajućih proizvoda nastane radnjama obrade i svi elementi privremeno izvezenih roba se nalaze u svakom od kompenzirajućih proizvoda; u tom slučaju količina privremeno izvezenih roba za koju se smatra da je prisutna u količini datog kompenzirajućeg proizvoda za koji je nastao carinski dug, proporcionalna je:
 - 1) omjeru količine određene vrste kompenzirajućeg proizvoda i ukupne količine svih kompenzirajućih proizvoda; i
 - 2) omjeru količine kompenzirajućih proizvoda za koju je nastao carinski dug i ukupne količine tih proizvoda iste vrste.

(6) Pri odlučivanju da li su ispunjeni uvjeti za primjenu kvantitativne metode iz stava (5) ovog člana, gubici se ne uračunavaju. Bez odstupanja od člana 436. Odluke, gubici znače udio privremeno izvezene robe koji je uništen i izgubljen u toku radnji obrade, naročito isparavanjem, sušenjem, ispuštanjem u obliku plina ili curenjem. U vanjskoj obradi, sekundarni kompenzirajući proizvodi koji čine otpatke, škart, talog, opiljke i ostatke smatraju se gubicima.

(7) Vrijednosna metoda je način izračunavanja udjela privremeno izvezene robe u različitim kompenzirajućim proizvodima, na osnovu vrijednosti dobivenih kompenzirajućih proizvoda. Vrijednosna metoda se primjenjuje samo ako se ne može primijeniti kvantitativna metoda. Količina

privremeno izvezene robe za koju se smatra da je prisutna u količini datog kompenzirajućeg proizvoda za koji nastaje carinski dug, proporcionalna je:

- a) ukupnoj vrijednosti date određene vrste kompenzirajućeg proizvoda kao procenat u ukupnoj vrijednosti svih kompenzirajućih proizvoda; i
- b) vrijednosti kompenzirajućih proizvoda za koje je nastao carinski dug, kao procenat u ukupnoj vrijednosti kompenzirajućih proizvoda te vrste.

Vrijednost svakog od ovih kompenzirajućih proizvoda koja se treba koristiti za primjenu vrijednosne metode je trenutna ex-works (tvornička) cijena u BiH ili trenutna prodajna cijena u BiH identičnih ili sličnih proizvoda, pod uvjetom da na njih nije uticao odnos između kupca i prodavca.

(8) Kada se vrijednost ne može utvrditi u skladu sa stavom (7) ovog člana, utvrđuje se bilo kojom drugom odgovarajućom metodom, koja daje jednake ili odgovarajuće rezultate.

GLAVA III. TOK POSTUPKA I OBRAČUN UVOZNIH DAŽBINA

Član 16.

(Popunjavanje carinske prijave za ulazak u i razduživanje vanjske obrade)

(1) Carinska prijava za ulazak robe u i razduživanje vanjske obrade podnosi se i popunjava u skladu s propisima kojima je regulirano pitanje podnošenja i popunjavanja carinskih prijava.

(2) Pravilno popunjavanje carinske prijave iz stava (1) ovog člana od značaja je za utvrđivanje carinskog statusa robe, obračuna carinskog duga, pravilne primjene trgovinskih mjera, identifikacije robe i drugo.

Član 17.

(Stavljanje robe u postupak vanjske obrade)

(1) Roba se prijavljuje za postupak vanjske obrade podnošenjem carinske prijave EX 2 (npr., ovisno o slučaju, šifra postupka 2100, 2151, 2178) prijavnom carinskom uredu navedenom u odobrenju, u roku važenja odobrenja. Ako su prijavni i nadzorni carinski ured različiti uredi, u tom slučaju prijavni carinski ured je obavezan dostaviti nadzornom carinskom uredu kopiju carinske prijave o privremenom izvozu robe na vanjsku obradu. U polju 2 carinske prijave EX 2 upisuje se imalac odobrenja.

(2) Uz carinsku prijavu iz stava (1) ovog člana prilažu se dokumenta propisana članom 127. stav 1. Odluke (profaktura ili drugi dokument o robi iz kojih trebaju biti vidljivi svi elementi za obračun uvoznih dažbina), prijava o prethodnom carinski odobrenom postupanju ili upotrebi ako postoji, npr. kod šifre postupka 2151) i eventualno druga dokumenta potrebna za provedbu vanjske obrade.

(3) Carinska prijava iz stava (1) ovog člana podliježe modulu selektiviteta, odnosno analizi rizika, ovisno koje mjere i kontrole prijavni carinski ured smatra potrebnim u svakom konkretnom slučaju, imajući u vidu i mjere identifikacije određene odobrenjem ili druge eventualno potrebne mjere radi identifikacije robe i pravilnosti provedbe postupka.

Član 18.

(Razduživanje vanjske obrade ponovnim uvozom i stavljanjem u slobodan promet kompenzirajućih proizvoda)

(1) Vanjska obrada se razdužuje ponovnim uvozom kompenzirajućih proizvoda ili robe u nepromijenjenom stanju (neobrađena privremeno izvezena roba) uz istovremeno stavljanje u slobodan

promet, tj. kada je za kompenzirajuće proizvode ili robu u nepromijenjenom stanju prihvaćena carinska prijava IM 6 za ponovni uvoz s istovremenim stavljanjem u slobodan promet, u roku razduživanja određenom u carinskoj prijavi EX 2 koja se razdužuje. Carinska prijava EX 2 kojom je roba prijavljena za vanjsku obradu može se razdužiti odjednom ili u više puta.

(2) Vanjska obrada se razdužuje ili za količinu privremeno izvezene robe koja je, prema prihvaćenom normativu proizvodnje, sadržana u kompenzirajućim proizvodima ili za količinu robe u nepromijenjenom stanju prijavljenoj za ponovni uvoz po carinskoj prijavi za razduživanje vanjske obrade iz stava (1) ovog člana.

(3) Prijava kojom se razdužuje vanjska obrada podnosi se otpusnom carinskom uredu navedenom u odobrenju. Ako su otpusni i nadzorni carinski ured različiti uredi, u tom slučaju otpusni carinski ured je obavezan nadzornom carinskom uredu dostaviti kopiju carinske prijave o razduživanju vanjske obrade. Izuzetno, nadzorni carinski ured može odobriti da se carinska prijava za ulazak ili razduživanje vanjske obrade podnese nekom drugom carinskom uredu, osim onih koji su navedeni u odobrenju, pri čemu određuje način na koji će on biti obaviješten.

(4) Carinska prijava kojom se razdužuje vanjska obrada podliježe modulu selektiviteta, odnosno analizi rizika, ovisno koje mjere i kontrole otpusni carinski ured smatra potrebnim u svakom konkretnom slučaju, imajući u vidu i mjere identifikacije određene odobrenjem i druge eventualno potrebne mjere radi identifikacije robe i pravilnosti provedbe postupka.

(5) U slučajevima kada su kompenzirajući proizvodi ili roba u nepromijenjenom stanju, nakon ponovnog uvoza, a prije stavljanja u slobodan promet, u roku za razduživanje stavljeni u privremeni smještaj, smješteni u carinsko skladište ili slobodnu zonu, smatra se da vanjska obrada nije razdužena sve do njihovog stavljanja u slobodan promet po carinskoj prijavi IM 6, u roku razduživanja. U tim slučajevima, u pogledu popunjavanja polja 37 carinske prijave, počev od ulaska robe u vanjsku obradu do razduživanja vanjske obrade, shodno Prilogu 20. Odluke (primjer za polje 37. Uvozni/izvozni postupci), postoje slijedeće radnje i to: prva radnja: privremeni izvoz na vanjsku obradu po EX 2 prijavi, šifra postupka 2100; druga radnja: nakon ponovnog uvoza smještaj u carinsko skladište po IM 7 prijavi, šifra postupka 7121; treća radnja: nakon carinskog skladištenja, stavljanje u slobodan promet po IM 6 carinskoj prijavi u roku razduživanja, šifra postupka 6121 (ne 6171). Ukoliko se u navedenom slučaju kompenzirajući proizvodi, nakon privremenog smještaja, smještaja u carinsko skladište ili slobodnu zonu stavljaju u slobodan promet ili neko drugo carinski odobreno postupanje ili upotrebu poslije isteka roka za razduživanje vanjske obrade, na iste se ne mogu primijeniti pravila o potpunom ili djelimičnom oslobađanju od plaćanja uvoznih dažbina u okviru vanjske obrade, nego uobičajena pravila koja se primjenjuju kod stavljanja robe koja nije bh. roba u zahtijevano carinski odobreno postupanje ili upotrebu bez prethodnog postupka.

(6) U slučajevima iz stava (1) i stava (5) ovog člana, ovisno od slučaja koji je u pitanju, uz carinsku prijavu prilažu se dokumenta navedena u odredbama člana 125. do 128. Odluke.

Član 19.

(Postupak za ne vraćenu robu)

(1) Kada se roba privremeno izvezena na vanjsku obradu, ne vrati u BiH u roku razduživanja vanjske obrade, bilo u obliku kompenzirajućih proizvoda, bilo u nepromijenjenom stanju, vanjsku obradu treba završiti konačnim izvozom, tj. robu treba trajno (redovno) izvezno ocariniti.

(2) U slučaju iz stava (1) ovog člana, nosilac odobrenja dužan je, kod otpusnog carinskog ureda, u roku razduživanja, podnijeti carinsku prijavu za postupak trajnog izvoza EX 1 (šifra postupka 1021), uz koju treba priložiti kopiju primjerka 3 carinske prijave EX 2 ovjerenog od izlaznog graničnog ureda preko kojeg je ne vraćena privremeno izvezena roba na vanjsku obradu istupila iz carinskog područja BiH. U polju 44 EX 1 prijave unose se podaci o odobrenju za vanjsku obradu.

(3) Nakon okončanja postupka po carinskoj prijavi iz stava (2) ovog člana, otpusni carinski ured, u svim primjercima izvozne carinske prijave, u polju C, kao i u inspekcijom aktu te prijave, unosi zabilješku: "Trajni izvoz nevraćene robe sa vanjske obrade", nakon čega primjerak 3 izvozne carinske prijave EX 1 vraća nosiocu odobrenja, kako bi nadležnim organima mogao dokazati da je roba trajno izvezena. Sam primjerak 3 EX 2 prijave u ovom slučaju ne može služiti u svrhe oslobađanja od plaćanja poreza na dodatu vrijednost za izvoz, nego samo prijava EX 1 zajedno sa potvrdom o istupu robe na EX 2 prijavi. Primjerak 3 EX 1 izvozne carinske prijave se ne upućuje na granični prijelaz radi ovjere fizičkog istupa robe iz BiH, jer je roba već u inostranstvu, nego se shodno toj carinskoj prijavi privremeni izvoz na vanjsku obradu preinačuje u trajni (redovni) izvoz. U tim slučajevima, neovisno o datumu EX 1 izvozne carinske prijave, smatra se da je roba trajno izvezena onog dana kada je fizički istupila iz carinskog područja BiH po prethodnoj EX 2 carinskoj prijavi.

Član 20.

(Carinska vrijednost privremeno izvezene robe)

(1) Iznos uvoznih dažbina za privremeno izvezenu robu koji treba da se oduzme u skladu s članom 147. Zakona i članom 22. stav (2) ovog Uputstva obračunava se na osnovu količine i karaktera (vrste) predmetne robe na dan prihvatanja carinske prijave za njeno stavljanje u postupak vanjske obrade i na osnovu drugih elemenata za obračun dažbina koji se primjenjuju na tu robu na dan prihvatanja prijave za stavljanje kompenzirajućih proizvoda u slobodan promet.

(2) Vrijednost robe za privremeni izvoz je vrijednost koja se prihvati za tu robu prilikom utvrđivanja carinske vrijednosti kompenzirajućih proizvoda u skladu s odredbom člana 29. stav 1. tačka (b) (i) Zakona ili ako vrijednost ne može da se utvrdi na taj način, onda razlika između carinske vrijednosti kompenzirajućih proizvoda i troškova obrade utvrđenih pomoću prihvatljivih sredstava.

(3) Kod utvrđivanja vrijednosti robe za privremeni izvoz, u skladu s jednom od metoda iz člana 147. stav 2. Zakona, odnosno za izračunavanje iznosa koji treba da se oduzme, određeni troškovi, u skladu s članom 387. Odluke, ne uzimaju se u obzir prilikom obračunavanja tog iznosa, i to:

- 1) antidamping i zaštitne carine,
- 2) za sekundarne kompenzirajuće proizvode koji čine otpatke, škart, talog, opiljke i ostatke smatra se da su uključeni,
- 3) troškovi utovara, prijevoza i osiguranja za robu za privremeni izvoz do mjesta gdje je radnja obrade ili posljednja takva radnja izvršena pri utvrđivanju vrijednosti robe za privremeni izvoz koja se uzima u obzir prilikom utvrđivanja carinske vrijednosti kompenzirajućih proizvoda u skladu s članom 29. stav 1. tačka (b) (i) Zakona,
- 4) troškovi utovara, prijevoza i osiguranja za robu za privremeni izvoz do mjesta gdje je radnja obrade ili posljednja takva radnja izvršena pri utvrđivanju troškove obrade, kada se vrijednost robe za privremeni izvoz ne može odrediti u skladu s članom 29. stav 1. tačka (b) (i) Zakona.

(4) Troškovi utovara, prijevoza i osiguranja robe za privremeni izvoz od mjesta vršenja radnje obrade ili mjesta posljednje radnje obrade do mjesta ulaska u carinsko područje BiH, uključuju se u troškove obrade.

(5) Troškovi utovara, prijevoza i osiguranja uključuju:

- 1) provizije i posredničke provizije, izuzev provizija pri kupovini,
- 2) troškove kontejnera koji ne čine integralnu cjelinu s robom za privremeni izvoz,
- 3) troškovi pakovanja, uključujući rad i materijale,
- 4) manipulativne troškove u vezi s prijevozom robe.

(6) Kada je, prije stavljanja u vanjsku obradu, roba za privremeni izvoz bila stavljena u slobodan promet po sniženoj stopi na osnovu njene krajnje upotrebe, a onoliko dugo koliko uvjeti za odobravanje snižene stope nastavljaju da se primjenjuju, iznos koji treba da se oduzme je iznos uvoznih dažbina koji je stvarno naplaćen prilikom stavljanja robe u slobodan promet.

Član 21.
(Carinska vrijednost kompenzirajućih proizvoda)

Carinska vrijednost kompenzirajućih proizvoda uključuje stvarno plaćenu ili plativu cijenu za kompenzirajuće proizvode koju čini:

- a) vrijednost privremeno izvezeno robe,
- b) vrijednost usluge vanjske obrade,
- c) vrijednost dodanog materijala u inostranstvu,
- d) ostali troškovi i izdaci ako nisu obuhvaćeni u vrijednosti iz računa:
 - 1) srazmjernan dio vrijednosti privremeno izvezeno robe, ugrađene ili upotrijebljene u proizvodnji kompenzirajućih proizvoda, koje je naručilac vanjske obrade isporučio stranoj osobi bez naplate ili po sniženoj cijeni,
 - 2) provizije i naknada posredovanja, osim kupovne provizije,
 - 3) troškovi ambalaže koja se za carinske svrhe smatra cjelinom zajedno sa odnosnom robom,
 - 4) troškovi pakovanja, bilo za rad ili materijale,
 - 5) troškovi prijevoza i osiguranja i troškovi utovara i rukovanja koji su povezani s prijevozom robe do mjesta ulaska u carinsko područje BiH (utovar, pretovar i dr.),
 - 6) srazmjernan dio vrijednosti materijala, sastavnih dijelova i slične robe, kupljene u inostranstvu, koju je naručilac vanjske obrade isporučio stranoj osobi bez naplate ili po sniženoj cijeni,
 - 7) naknade za autorska prava i licence u vezi s robom čija se vrijednost utvrđuje, a koje naručilac posla mora da plati, direktno ili indirektno, kao uvjet prodaje robe čija se vrijednost utvrđuje, u mjeri u kojoj takve naknade za autorska prava i licence nisu uključene u stvarno plaćenu ili plativu cijenu i dr.

Član 22.
(Utvrđivanje potpunog ili djelimičnog oslobađanje od plaćanja uvoznih dažbina)

(1) Potpuno ili djelimično oslobađanje od plaćanja uvoznih dažbina, propisano članom 147. Zakona, odobrava se samo kada se kompenzirajući proizvodi prijavljuju za stavljanje u slobodan promet u ime ili za račun imaoća odobrenja ili drugog lica koje je registrirano u BiH, pod uvjetom da to lice ima suglasnost imaoća odobrenja, te da su ispunjeni propisani uvjeti i obaveze vezane za provedbu vanjske obrade.

(2) Potpuno ili djelimično oslobađanje od plaćanja uvoznih dažbina, u skladu s članom 147. stav 1. i 2. Zakona, određuje se tako što se od iznosa uvoznih dažbina koje se primjenjuju na kompenzirajuće proizvode koji se stavljaju u slobodan promet oduzima iznos uvoznih dažbina koji bi se primjenjivao istog dana na robu za privremeni izvoz kad bi se uvozila u carinsko područje BiH iz zemlje u kojoj je prošla proces obrade ili posljednji proces obrade.

(3) Kod djelimičnog oslobađanja od plaćanja uvoznih dažbina, iznos uvoznih dažbina predstavlja pozitivna razlika između iznosa uvoznih dažbina za kompenzirajuće proizvode i iznosa uvoznih dažbina za privremeno izvezenu robu. Ako je iznos uvoznih dažbina za privremeno izvezenu robu veći od iznosa uvoznih dažbina za kompenzirajuće proizvode, tj. ukoliko je razlika negativna, radi se o potpunom oslobađanju od plaćanja uvoznih dažbina.

(4) Obračun uvoznih dažbina i drugih indirektnih poreza (u daljnjem tekstu: carinski dug) vrši se na obrascu iz Priloga 2. ovog Uputstva. Obračun se sastavlja u dva primjerka i sastavni je dio carinske prijave. Jedan primjerak obračuna, nakon njegove kontrole, otpusni carinski ured vraća nosiocu odobrenja uz njegov primjerak carinske prijave po kojoj su kompenzirajući proizvodi stavljeni u slobodan promet, a drugi primjerak zadržava uz carinsku prijavu. Ukupno obračunati iznos carinskog duga za plaćanje (razlika obračunatih uvoznih dažbina, porez na dodatu vrijednost i eventualno drugi

indirektni porezi) mora biti upisan u polje 47 carinske prijave, što se, u obradi carinske prijave putem informacionog sistema, postiže pravilnim popunjavanjem određenih drugih polja carinske prijave na način kako je to propisano propisima o popunjavanju carinske prijave.

(5) U skladu s članom 149. stav 2. Zakona i članom 388. i 389. Odluke, djelimično oslobađanje od plaćanja uvoznih dažbina gdje se troškovi obrade uzimaju kao osnovica za obračun uvoznih dažbina, može se odobriti ako to nosilac odobrenja zatraži i ispunjeni su uvjeti iz člana 389. Odluke. U troškove obrade uračunavaju se sva plaćanja (u novcu, robi ili uslugama) koje obavlja ili treba obaviti nosilac odobrenja u korist lica koje obavlja obradu, ili posredna ili neposredna plaćanja kao uvjet za obavljanje obrade privremeno izvezene robe (u obzir se uzimaju svi troškovi i izdaci u skladu s članom 29. Zakona) i ako su ti troškovi jedino plaćanje korisnika odobrenja, te na njih ne utiče bilo kakav oblik povezanosti nosioca odobrenja i lica koje je obavilo proces obrade.

(6) U slučaju kada se roba privremeno izvezena na vanjsku obradu vraća u carinsko područje BiH u stanju u kakvom je bila izvezena (u nepromijenjenom stanju), na zahtjev imaooca odobrenja, odobrava se oslobađanje od plaćanja uvoznih dažbina samo ako su ispunjeni uvjeti propisani odredbama člana 177. i 178. Zakona, u kom slučaju se rok iz člana 177. Zakona računa od dana kada je privremeno izvezena roba istupila iz carinskog područja BiH po EX 2 carinskoj prijavi. Provedba postupka se odvija u skladu s propisima koji se odnose na primjenu odredaba člana 177. i 178. Zakona.

Primjeri obračuna uvoznih dažbina

Prvi primjer - djelimično oslobađanje

a) Kompenzirajući proizvod: plastični zupčanici

Zemlja obrade: SAD

Carinska stopa: 5%

Neto težina: 400 kg

Vrijednost na dan puštanja u slobodan promet: 22.500 KM

b) Privremeno izvezena roba: PVC granulat

Carinska stopa na dan puštanja u slobodan promet: 5%

Neto težina: 1.000 kg

Normativ utroška u odobrenju: potrebno 125 kg privremeno izvezene robe za proizvodnju 100 kg kompenzirajućeg proizvoda

Vrijednost na dan puštanja u slobodna promet: 6,00 KM/kg.

c) Uvozne dažbine

5) Uvozne dažbine na kompenzirajuće proizvode: $22.500,00 \text{ KM} \times 5\% = 1.125,00 \text{ KM}$

6) Uvozne dažbine na privremeno izvezenu robu:

7) Količina koja se obračunava: $\frac{400 \times 125}{100} = 500 \text{ kg}$

8) Vrijednost te količine: $500,00 \times 6 = 3.000,00 \text{ KM}$

9) Obračun uvoznih dažbina: $3.000,00 \text{ KM} \times 5\% = 150,00 \text{ KM}$

Uvozne dažbine koje treba platiti: $1.125,00 \text{ KM} - 150,00 \text{ KM} = 975,00 \text{ KM} + \text{porez na dodatu vrijednost}$

Drugi primjer - potpuno oslobađanje

a) Kompenzirajući proizvod: platnene putne torbe

Zemlja obrade: Mađarska

Carinska stopa: 5%

Broj: 4.000 komada

Vrijednost na dan puštanja u slobodan promet: 60.000 KM

b) Privremeno izvezena roba:

Plastificirano platno:

Carinska stopa na dan puštanja u slobodan promet: 10%

Količina ugrađena u 4.000 putničkih torbi: 5.000 metara

Vrijednost na dan puštanja u slobodan promet: 35.000 KM

Etikete sa markom i adresom PVC proizvođača:

Carinska stopa na dan puštanja u slobodan promet: 15%

Količina ugrađena u 4.000 putničkih torbi: 4.000 komada

Vrijednost na dan puštanja u slobodan promet: 2.000 KM

c) Uvozne dažbine:

Uvozne dažbine na kompenzirajuće proizvode: $60.000,00 \text{ KM} \times 5\% = 3.000,00 \text{ KM}$

Uvozne dažbine na privremeno izvezenu robu:

- na platno: $35.000,00 \text{ KM} \times 10\% = 3.500,00 \text{ KM}$

- na etikete: $2.000,00 \text{ KM} \times 15\% = \underline{300,00 \text{ KM}}$

Uvozne dažbine koje treba oduzeti: $3.500,00 \text{ KM} + 300,00 \text{ KM} = 3.800,00 \text{ KM}$

Uvozne dažbine koje treba platiti: $3.000,00 \text{ KM} - 3.800,00 \text{ KM} =$ razlika negativna (potpuno oslobađanje od plaćanja uvoznih dažbina) + porez na dodatnu vrijednost

Član 23.

(Obračun carinskog duga u drugim situacijama)

(1) Ako bi privremeno izvezena roba kod puštanja u slobodan promet ispunjavala uvjete za primjenu smanjene ili nulte carinske stope na osnovu njene krajnje upotrebe, ta stopa se, u skladu s članom 147. stav 3. Zakona, uzima u obzir pod uvjetom da je roba prošla postupke koji su u skladu s takvom krajnjom upotrebom u zemlji gdje je izvršen postupak obrade ili zadnji takav postupak.

(2) U skladu s članom 147. stav 4. Zakona, kada kompenzirajući proizvodi ispunjavaju uvjete za preferencijalnu tarifnu mjeru u smislu člana 17. stav 4. tačka (c) Zakona, a ta mjera postoji za robu koja potpada pod istu tarifnu oznaku kao i roba koja se privremeno izvozi, stopa uvozne dažbine koja se treba uzeti u obzir prilikom utvrđivanja iznosa koji se oduzima u skladu s članom 22. stav (3) ovog Uputstva je ona stopa koja bi se primjenjivala kada bi privremeno izvezena roba ispunjavala uvjete pod kojima se može primijeniti ta preferencijalna mjera.

(3) Član 147. Zakona ne odstupa od primjene propisa koji su usvojeni ili treba da se usvoje u kontekstu trgovine između BiH i drugih zemalja, a kojima se predviđa oslobađanje od plaćanja uvoznih dažbina za određene kompenzirajuće proizvode.

Primjer obračuna uvoznih dažbina prema stavu 2. ovog člana - uz primjenu preferencijalne tarife mjere

a) Kompenzirajući proizvod: čokoladna pasta sa kakaom u pakovanju od po više od 1 kg

Zemlja obrade: Austrija

Čokoladna pasta je uvezena sa dokumentom EUR 1 - porijeklo EU

Preferencijalna carinska stopa: 5%

Količina: 7.000 kg

Vrijednost na dan puštanja u slobodan promet: 35.000,00 KM

b) Privremeno izvezeni proizvod: kakao prah

Carinska stopa (redovna): 10%

Preferencijalna carinska stopa: 5%

Količina kakao praha koju sadrži pasta: 1.400 kg

Vrijednost na dan puštanja u slobodan promet: 7.500,00 KM

c) Uvozne dažbine:

- Uvozne dažbine na kompenzirajući proizvod: $35.000,00 \text{ KM} \times 5\% = 1.750,00 \text{ KM}$

- Uvozne dažbine na privremeno izvezenu robu: $7.500,00 \text{ KM} \times 5\% = 375,00 \text{ KM}$

- Uvozne dažbine koje treba platiti: $1.750,00 \text{ KM} - 375,00 \text{ KM} = 1.375,00 \text{ KM} + \text{porez na dodatu vrijednost}$

N a p o m e n a:

Kada se za kompenzirajuće proizvode za obračun uvoznih dažbina koristi preferencijalna tarifa mjera, tada se dažbine koje treba oduzeti za privremeno izvezenu robu također obračunavaju po preferencijalnoj tarifnoj stopi ukoliko su ispunjeni dati uvjeti.

GLAVA IV. POPRAVAK ROBE U OKVIRU VANJSKE OBRADJE

ODJELJAK I. POPRAVAK ROBE

Član 24.

(Vanjska obrada u svrhu popravke robe)

(1) Vanjska obrada može se odobriti radi popravke privremeno izvezene robe koja se, nakon obavljene popravke, ponovno uvozi u BiH. Vanjska obrada u svrhu popravke robe može se odobriti samo ako je roba koja se privremeno izvozi podobna za popravak, odnosno ako se utvrdi da je moguće izvršiti popravak robe koja se privremeno izvozi. Radi navedenog, carinski ured iz člana 5. stava (2) ovog uputstva je dužan, iz dokumenata priloženih uz carinsku prijavu EX 2, provjeriti da li je moguć popravak robe koja je deklarirana za privremeni izvoz radi popravke. Iz prepiski korisnika vanjske obrade i strane osobe koja će obavljati popravak (ugovor, ponude, obavijesti i sl.) mora biti vidljivo da je moguće popraviti robu koja je predmet vanjske obrade, u koje svrhe, carinski ured može zatražiti i dodatne dokaze. Carinski ured neće odobriti vanjsku obradu ukoliko utvrdi da se vanjska obrada zahtijeva u svrhu poboljšanja tehničkih osobina robe.

(2) Odobrenje za vanjsku obradu radi popravke može se odnositi na popravak robe:

- a) privremeno izvezene, koja će biti ponovno uvezena,
- b) u standardnom sistemu razmjene, kada se uvozi zamjenski proizvod u zamjenu za izvezenu robu,
- c) u standardnom sistemu razmjene, uz prethodni uvoz zamjenskog proizvoda.

(3) Privremeno izvezena roba za koju je odobrena vanjska obrada radi popravke, neovisno o tome da li se popravak obavlja u standardnom sistemu razmjene ili ne, može biti puštena u slobodan promet uz potpuno ili djelimično oslobađanje od plaćanja uvoznih dažbina, ovisno od toga da li je popravak obavljen sa ili bez plaćanja.

Član 25.

(Potpuno oslobađanje od plaćanja uvoznih dažbina kod popravke robe)

(1) Prema odredbama člana 148. Zakona, kada je svrha vanjske obrade popravak robe za privremeni izvoz, roba se nakon popravke može staviti u slobodan promet uz potpuno oslobađanje od plaćanja uvoznih dažbina ako:

- a) je roba popravljena besplatno, bilo zbog ugovorene ili propisane obaveze koja proizilazi iz garancije ili zbog greške u proizvodnji i
- b) u vrijeme kad je predmetna roba prvobitno stavljena u slobodan promet greška nije uzeta u obzir kod utvrđivanja carinske vrijednosti.

(2) U svrhu dokazivanja ispunjenosti uvjeta iz stava (1) ovog člana, pri ponovnom uvozu i stavljanju u slobodan promet robe koja je bila predmetom popravke, korisnik odobrenja dužan je priložiti slijedeće dokumente:

- a) ispravu o garantnom roku, izjavu ili drugu ispravu na temelju koje se može utvrditi da se radi o besplatnoj popravci u garantnom roku,

- b) carinsku prijavu i dokumentaciju priloženu uz istu koja se odnosi na prvobitno stavljanje robe u slobodan promet, radi provjere da li je u vrijeme stavljanja u slobodan promet greška uzeta u obzir ili ne kod utvrđivanja carinske vrijednosti.

(3) Potpuno oslobađanje od plaćanja uvoznih dažbina ne primjenjuje se u slučajevima kada je greška utvrđena (poznata) u momentu kada je roba koja je u pitanju bila prvi put stavljena u slobodan promet i uzeta u obzir kod utvrđivanja carinske vrijednosti.

(4) U slučaju iz stava (1) ovog člana, u carinskoj prijavi IM 6 za puštanje u slobodan promet, polje 24 popunjava se sa šifrom 53, a u polju 31 treba da stoji naznaka: "Besplatna popravka - potpuno oslobađanje".

Član 26.

(Djelimično oslobađanje od plaćanja uvoznih dažbina kod popravke robe)

(1) U skladu s članom 149. stav 1. Zakona, djelimično oslobađanje od plaćanja uvoznih dažbina gdje se kod popravke robe troškovi proizvodnje (popravke) uzimaju kao osnovica za obračun uvoznih dažbina, može se odobriti:

- a) za robu čiji je popravak obavljen uz naknadu i
- b) kada je popravak obavljen besplatno, ali nisu ispunjeni uvjeti iz člana 25. stav (1) ovog Uputstva.

(2) Djelimično oslobađanje od plaćanja uvoznih dažbina iz stava (1) ovog člana odobrava se utvrđivanjem iznosa dažbina koji se primjenjuje na osnovu elemenata za obračun dažbina za kompenzirajuće proizvode (proizvod izvezen na popravku) na dan prihvatanja prijave za stavljanje u slobodan promet tih proizvoda, te uzimanjem u obzir iznosa koji je jednak troškovima proizvodnje. U troškove proizvodnje uračunavaju se sva plaćanja (u novcu, robi ili uslugama) koje obavlja ili treba obaviti nosilac odobrenja u korist lica koje obavlja obradu, ili posredna ili neposredna plaćanja kao uvjet za obavljanje obrade privremeno izvezeno robe (u obzir se uzimaju svi troškovi i izdaci u skladu s članom 29. Zakona) i ako su ti troškovi jedino plaćanje korisnika odobrenja, te na njih ne utiče bilo kakav oblik povezanosti nosioca odobrenja i lica koje je obavilo popravak.

(3) U slučaju iz stava (1) ovog člana, u carinskoj prijavi IM 6 za puštanje u slobodan promet, polje 24 popunjava se sa šifrom 52, a u polju 31 treba da stoji naznaka: "Popravak uz naknadu".

Član 27.

(Popravak robe nekomercijalnog karaktera)

(1) Popravak robe nekomercijalnog karaktera podrazumijeva popravak na robi, uključujući vraćanje robe u prvobitno stanje, a koji popravak se obavlja povremeno i odnosi se isključivo na robu koja je namijenjena ličnim potrebama podnosioca zahtjeva i njegove porodice i koja, obzirom na vrstu i količinu, nema komercijalni karakter.

(2) Na popravak robe nekomercijalnog karaktera odgovarajuće primjenjuju se odredbe člana 5. i člana 24. do 26. ovog Uputstva.

ODJELJAK II. POPRAVAK ROBE PREMA STANDARDNOM SISTEMU RAZMJENE U VANJSKOJ OBRADI

Član 28.

(Standardni sistem razmjene bez prethodnog uvoza)

(1) Standardni sistem razmjene može se odobriti samo u slučajevima kada se postupak vanjske obrade odnosi na popravak robe. Primjena ovog sistema (npr. kada strani isporučilac odluči da robu trajno zadrži zato što nije u stanju da otkloni greške ili zato što to nije isplativo) dopušta da se, umjesto

kompenzirajućeg proizvoda, uveze drugi uvozni proizvod (u daljnjem tekstu: zamjenski proizvod). Zamjenski proizvod mora ispunjavati uvjete iz člana 151. Zakona. Kod standardnog sistema razmjene privremeno izvezenu bh. robu nadomješta, odnosno zamjenjuje zamjenski proizvod i privremeno izvezena roba se ne vraća u BiH, a niti se zamjenski proizvod vraća u inostranstvo.

(2) Carinski ured iz člana 5. stav (2) ovog Uputstva prethodno provjerava da li su ispunjeni uvjeti za primjenu standardnog sistema razmjene. Podnosilac carinske prijave za korištenje ovog sistema carinskom uredu mora dokazati da razmjena nije ugovorena radi poboljšanja tehničkih karakteristika robe, u koju svrhu, carinski organ može provjeriti ugovore, račune i druge pripadajuće isprave u vezi s popravkom, pri čemu posebno treba obratiti pažnju na uvjete predviđene u tim ugovorima ili računima, posebno uvjete plaćanja. Iz podnesenih isprava (ugovor, predračun, korespodencija između stranaka i dr.) mora jasno proizlaziti da će popravak biti obavljen na način da će biti isporučen zamjenski proizvod koji ispunjava sve propisane uvjete.

Član 29.

(Standardni sistem razmjene uz prethodni uvoz)

(1) Carinski ured iz člana 5. stav (2) ovog Uputstva može odobriti da se, pod određenim uvjetima, zamjenski proizvod uveze prije privremenog izvoza robe, u kom slučaju se radi se o prethodnom uvozu zamjenskog proizvoda. Korisnik ovog sistema razmjene mora položiti obezbjeđenje za namirenje eventualnog carinskog duga za zamjenski proizvod, koji bi mogao nastati ukoliko bh. roba za privremeni izvoz ne bude izvezena u roku iz stava (2) ovog člana.

(2) Kod sistema razmjene uz prethodni uvoz zamjenskog proizvoda, bh. roba se mora privremeno izvesti u roku dva mjeseca od dana prihvatanja carinske prijave za puštanje zamjenskog proizvoda u slobodan promet (i ne vraća se u BiH, jer je umjesto nje uvezen zamjenski proizvod), a korisnik ovog sistema razmjene carinskom uredu mora pružiti dokaz o fizičkom istupu bh. robe iz carinskog područja BiH. Izuzetno, na osnovu blagovremenog zahtjeva korisnika odobrenja i kada to opravdavaju okolnosti konkretnog slučaja, carinski ured može produžiti rok za određeno razdoblje, najduže za dva mjeseca.

Član 30.

(Potpuno ili djelimično oslobađanje od uvoznih dažbina kod standardnog sistema razmjene bez prethodnog uvoza)

(1) Prema članu 150. Zakona, odredbe Zakona koje se primjenjuju na kompenzirajuće proizvode u vanjskoj obradi primjenjuju se i na zamjenske proizvode. Shodno tome, u primjeni standardnog sistema razmjene, potpuno ili djelimično oslobađanje od plaćanja uvoznih dažbina utvrđuje se, ovisno od situacije, shodno odredbama člana 147. ili 148. Zakona, odnosno odredbama člana 22. i 23. ili člana 25. ovog Uputstva.

(2) U primjeni standardnog sistema razmjene bez prethodnog uvoza, postupak se može provesti i tako da se istovremeno obavi privremeni izvoz bh. robe na popravak i uvoz zamjenskog proizvoda, pri čemu se carinskom uredu podnosi carinska prijava po kojoj se bh. roba privremeno izvozi (EX 2, u polju 37 šifra postupka 2100) i carinska prijava za puštanje zamjenskog proizvoda u slobodan promet (IM 6, šifra postupka 6121, a u polju 24 - povrat robe nakon popravke (šifra 52), te se postupa na identičan način kao kada je bh. roba ranije privremeno izvezena, a naknadno se uvozi zamjenski proizvod. U polju 31 EX 2 i IM 6 carinske prijave treba upisati naznanku: "Standardni sistem razmjene bez prethodnog uvoza".

(3) Carinski ured utvrđuje elemente za obračun carinskog duga, te potpuno ili djelimično oslobađanje od plaćanja uvoznih dažbina. Potpuno ili djelimično oslobađanje od plaćanja uvoznih dažbina, utvrđuje se shodno članu 147. Zakona, odnosno članu 22. i 23. ovog Uputstva, tako da se od iznosa uvoznih dažbina obračunatih za zamjenski proizvod koji se pušta u slobodan promet oduzme iznos uvoznih dažbina koji bi se obračunao istog dana za privremeno izvezenu robu, kada bi se ona uvozila u BiH iz zemlje u kojoj je bila predmet proizvodnih radnji ili zemlje u kojoj je bila posljednja

radnja. Iznos koji treba da se oduzme utvrđuje se na osnovu elemenata za obračun dažbina koji se primjenjuju na robu za privremeni izvoz u trenutku prihvatanja carinske prijave po kojoj je ta roba stavljena u postupak vanjske proizvodnje.

(4) Obračun carinskog duga vrši se na obrascu iz Priloga 3. ovog Uputstva i sastavni je dio carinske prijave IM 6. Obračun se sastavlja u dva primjerka, od kojih jedan primjerak, nakon njegove kontrole, carinski ured vraća korisniku sistema razmjene bez prethodnog uvoza, a drugi primjerak zadržava uz carinsku prijavu. Ukupno obračunati iznos carinskog duga za plaćanje (razlika obračunatih uvoznih dažbina i drugi indirektni porezi) upisuje se u polje 47 carinske prijave, što se, u obradi carinske prijave putem informacionog sistema, postiže pravilnim popunjavanjem određenih drugih polja prijave na način kako je to propisano propisima o popunjavanju carinske prijave.

(5) Ako se zamjenski proizvod daje bez naknade bilo zbog ugovorene ili zakonske obaveze koja proizilazi iz garancije ili zbog greške u proizvodnji, potpuno oslobađanje od plaćanja uvoznih dažbina utvrđuje se u skladu s članom 148. Zakona, odnosno članom 25. ovog Uputstva. U polju 31 EX 2 i IM 6 carinske prijave treba upisati naznanku: "Standardni sistem razmjene bez prethodnog uvoza", a u polju 24 šifru 53.

(6) Nakon okončanja postupka po carinskoj prijavi IM 6, carinski ured dužan je u polju C EX 2 carinske prijave koju je zadržao u službenoj evidenciji i u njenom inspekcijom aktu unijeti broj i datum IM 6 carinske prijave (npr. IM 6 21/05.11.2008).

Član 31.

(Potpuno ili djelimično oslobađanje od uvoznih dažbina kod standardnog sistema razmjene uz prethodni uvoz)

(1) Ako se primjenjuje standardni sistem razmjene uz prethodni uvoz zamjenskog proizvoda, nadležnom carinskom uredu korisnik ovog sistema podnosi IM 6 carinsku prijavu za puštanje zamjenskog proizvoda u slobodan promet (u IM 6 prijavi u polju 37 šifra postupka 6121, a u polju 24 šifra 52 ili 53, ovisno o situaciji).

(2) U trenutku puštanja zamjenskog proizvoda u slobodan promet, carinski ured, po IM 6 carinskoj prijavi utvrđuje elemente za obračun carinskog duga na obrascu iz Priloga 3. ovog Uputstva, te potpuno ili djelimično oslobađanje od plaćanja uvoznih dažbina, pri čemu postupa u skladu sa članom 30. stav (3) i (4) ovog Uputstva. Kod ovog sistema standardne razmjene nastaje obaveza plaćanja iznosa carinskog duga obračunatog za plaćanje po IM 6 carinskoj prijavi (polje 47), dok je za razliku carinskog koji bi mogao nastati u slučaju da se ne ispuni obaveza privremenog izvoza bh. robe (jer u tom slučaju carinski dug treba obračunati na zamjenski proizvod kao da se redovno uvozi) korisnik postupka dužan položiti obezbjeđenje. Radi praćenja izvršenja obaveze privremenog izvoza bh. robe u odobrenom roku iz člana 29. stav (2) ovog Uputstva, IM 6 carinska prijava se upućuje na plavi put selektiviteta, kao i u slučaju iz stava (3) ovog člana.

(3) Ako se zamjenski proizvod daje bez naknade bilo zbog ugovorene ili zakonske obaveze koja proizilazi iz garancije ili zbog greške u proizvodnji, tada se, prema članu 150. Zakona, potpuno oslobađanje od plaćanja uvoznih dažbina utvrđuje u skladu sa članom 148. Zakona, odnosno članom 25. ovog Uputstva.

(4) Ukoliko je ispunjena preuzeta obaveza izvoza bh. robe od strane korisnika postupka, tj. kada je privremeni izvoz bh. robe izvršen (EX 2 prijava, šifra postupka 2100) u roku od dva mjeseca, odnosno u produženom roku koji je carinski ured odobrio na osnovu blagovremenog i opravdanog zahtjeva (uz predočenje dokaza o fizičkom istupu bh. robe iz carinskog područja, ovjeren primjerak 3 EX 2 prijave) i podaci o robi za privremeni izvoz prijavljeni u EX 2 prijavi se ne razlikuju od podataka koji su za istu robu uzeti u obzir pri utvrđivanju potpunog ili djelimičnog oslobađanja od plaćanja uvoznih dažbina po IM 6 carinskoj prijavi, carinski ured će osloboditi položeno obezbjeđenje, a IM 6 carinsku prijavu sa plavog puta selektiviteta uputiti u konačan status. Pri tome će, u polju C IM 6

carinske prijave (ručno) i u njenom inspeksijskom aktu unijeti podatke o broju i datumu EX 2 carinske prijave (npr. EX 2 56/20.11.2008).

(5) U polju 31 IM 6 i EX 2 carinske prijave treba upisati nazanku: "Standardni sistem razmjene uz prethodni uvoz".

Član 32.

(Obračun carinskog duga na zamjenski proizvod kada nije izvezena bh. roba)

(1) U slučajevima u kojima korisnik standardnog sistema razmjene uz prethodni uvoz zamjenskog proizvoda ne ispuni preuzetu obavezu i bh. robu ne izveze u roku od dva mjeseca, odnosno u dužem odobrenom roku, nastaje carinski dug puštanjem zamjenskog proizvoda u slobodan promet u skladu s članom 193. Zakona. U tom slučaju carinski ured će, na novom obrascu iz Priloga 3. ovog Uputstva, za zamjenski proizvod stavljen u slobodan promet po IM 6 carinskoj prijavi (član 31. stav (1) i (2) ovog Uputstva) utvrditi cjelokupan iznos carinskog duga za plaćanje na osnovu elemenata za obračun utvrđenih za zamjenski proizvod u IM 6 carinskoj prijavi, te shodno tome modificirati carinsku prijavu IM 6 i uputiti je u konačan status, a položeno obezbjeđenje se ne osloboda dok se u cijelosti ne izvrši plaćanje carinskog duga utvrđenog po navedenoj carinskoj prijavi.

GLAVA V. POREZ NA DODATU VRIJEDNOST I AKCIZA

Član 33.

(Porez na dodatu vrijednost u vanjskoj obradi)

(1) Pri ponovnom uvozu i puštanju u slobodan promet kompenzirajućih proizvoda nastalih u vanjskoj obradi, zajedno sa obračunom i naplatom uvoznih dažbina obračunava se i naplaćuje porez na dodatu vrijednost. Porezna obaveza, prema propisima o porezu na dodatu vrijednost, nastaje danom nastanka obaveze plaćanja carinskog duga kod uvoza dobara, ako te obaveze nema, u momentu kada bi nastala obaveza plaćanja tog duga, a to je kod vanjske obrade u trenutku prihvatanja carinske prijave IM 6 za puštanje kompenzirajućih proizvoda u slobodan promet.

(2) Prema članu 21. stav 5. Zakona o porezu na dodatu vrijednost ("Službeni glasnik BiH", broj 9/05 i 35/05), kod uvoza robe koja je privremeno izvezena radi popravke, prerade, dorade ili druge obrade izvan BiH, osnovicu za obračun poreza na dodatu vrijednost čini vrijednost te popravke, prerade, dorade ili druge obrade, uvećana u skladu sa članom 21. stav 2. navedenog zakona.

(3) Kod puštanja u slobodan promet zamjenskog proizvoda po sistemu standardne razmjene, bilo bez ili uz prethodni uvoz zamjenskog proizvoda, plaćanju poreza na dodatu vrijednost podliježe zamjenski proizvod, a poreznu osnovicu čini carinska vrijednost zamjenskog proizvoda, uvećana u skladu s članom 21. stav 2. Zakona o porezu na dodatu vrijednost.

(4) Roba čiji je popravak u okviru vanjske obrade, uključujući i standardni sistem razmjene, obavljen bez plaćanja u garantnom roku i ispunjava uvjete iz člana 25. stav (1) ovog Uputstva ne podliježe plaćanju poreza na dodanu vrijednost. U slučaju iz člana 26. stav (1) tačka b) ovog Uputstva nastaje obaveza plaćanja poreza na dodatu vrijednost.

Član 34.

(Akciza u vanjskoj obradi)

(1) Kod oporezivanja akcizom kompenzirajućih proizvoda dobivenih u vanjskoj obradi naplata akcize vrši se u roku za plaćanje carine i drugih uvoznih dažbina.

(2) Akciza na kompenzirajuće proizvode dobivene u vanjskoj obradi koji podliježu oporezivanju akcizom, se obračunava i naplaćuje po carinskoj prijavi za puštanje tih proizvoda u slobodan promet nakon vanjske obrade (IM 6). Iznos akcize obračunava se prema odredbama propisa o akcizama.

(3) Ako su akcizni kompenzirajući proizvodi dobiveni u vanjskoj obradi od privremeno izvezene bh. akcizne robe, tada iznos akcize za plaćanje, u skladu sa članom 11. Pravilnika o primjeni Zakona o akcizama u Bosni i Hercegovini ("Službeni glasnik BiH", broj 18/05 i 45/05), predstavlja pozitivna razlika između iznosa akcize na kompenzirajuće proizvode i iznosa akcize na količinu privremeno izvezene akcizne robe utrošene u proizvodnji količine kompenzirajućih proizvoda koji se puštaju u slobodan promet. Ako je razlika negativna, ne nastaje ni obaveza plaćanja akcize.

GLAVA VI. PRIJELAZNE I ZAVRŠNE ODREDBE

Član 35.

(Upotreba odobrenja i rješavanje zahtjeva)

(1) Odobrenja za vanjsku obradu izdata do dana početka primjene ovog Uputstva primjenjuju se do isteka roka njihovog važenja i pod uvjetima odobrenim tim odobrenjima, osim ako ne postoje druge smetnje za njihovo korištenje.

(2) Izmjene i dopune odobrenja za vanjsku obradu izdatih do stupanja na snagu ovog Uputstva mogu se tražiti najkasnije u roku od dva mjeseca od dana stupanja na snagu ovog Uputstva.

(3) Zahtjeve za izdavanje odobrenja za vanjsku obradu zaprimljene, a neriješene do stupanja na snagu ovog Uputstva, rješavat će carinski organ iz člana 4. stav (1) ovog Uputstva, u skladu s odredbama ovog Uputstva.

(4) Zahtjeve za izmjene ili dopune odobrenja za vanjsku obradu zaprimljene, a neriješene do stupanja na snagu ovog Uputstva, kao i zahtjeve za izmjene ili dopune odobrenja za vanjsku obradu podnijete u roku iz stava (2) ovog člana, rješavat će organ iz člana 4. stav (1) ovog Uputstva, u skladu s odredbama ovog Uputstva.

Član 36.

(Prestanak važenja ranijih propisa)

Danom stupanja na snagu ovog Uputstva prestaju da važe ranija akta kojima su regulirana pitanja koja su predmet ovog Uputstva.

Član 37.

(Sastavni dio uputstva)

Sastavni dio ovog Uputstva čine Prilog 1. iz člana 5. stav (3), Prilog 2. iz člana 22. stav (4) i Prilog 3. iz člana 30. stav (4) ovog Uputstva.

Član 38.

(Stupanje na snagu)

Ovo Uputstvo stupa na snagu osmog dana od dana objavljivanja u "Službenom glasniku BiH".

Broj:01- 02-2 566/09
Datum: 12.02.2009. godine

DIREKTOR
Kemal Čaušević

Prilog 1.

VANJSKA OBRADA - popravak robe*				
1. Carinski ured		2. Zakonski osnov: član 300. stav 3. tačka d) i 302. stav 3. Odluke o provedbenim propisima Zakona o carinskoj politici BiH		
3. Podnosilac zahtjeva (deklarant): (ime/naziv, adresa, I.B. ili JMB ako je u pitanju popravak nekomercijalne robe)				
4. Vrsta popravke (popravka u garantnom roku ili popravka uz plaćanje - izvan garantnog roka)				
5. Karakter popravke				
6. Istovjetnost robe (opis robe i druga sredstva za njenu identifikaciju)				
7. Privremeno izvezena roba na popravak				
Red.broj	Trgovački naziv robe	Tarifna oznaka robe	Količina	Vrijednost u KM
8. Predloženi rok za razduživanje vanjske obrade (u mjesecima)				
9. Izjava podnosioca zahtjeva (deklaranta): Deklarant u potpisu se obavezuje, da će robu navedenu u gornjem popisu u tački 7., zaključno s rednim brojem, ponovno uvesti u roku od Ako u izuzetnim slučajevima roba ostane izvan carinskog područja BiH, deklarant se obavezuje da će kod carinskog ureda iz tačke 1. ovog obrasca regulirati situaciju u vezi s nevraćenom robom.				
10. Mjesto i datum:		Pečat deklaranta:	Potpis odgovorne osobe deklaranta:	
11. Ovjera od carinskog ureda				
Broj i datum EX 2 carinske prijave:				
Odobreni rok za razduživanje (u mjesecima):				
Datum:		M.P.	Potpis i sl.šifra službenika:	

*Član 5. stav (3). Uputstva o carinskom postupku vanjske obrade (ovaj obrazac podnosi se ako je neophodan)

Prilog 2.

VANJSKA OBRADA - obračun carinskog duga						
1. Carinski ured			2. Broj i datum odobrenja			
3. Nosilac odobrenja						
4. Kompenzirajući proizvodi			5. Broj i datum carinske prijave za kompenzirajuće proizvode			

Red. br.	Trgovački naziv robe	Tarifna oznaka	Vrijednost	Stopa uvozne dažbine	Iznos uvozne dažbine
----------	----------------------	----------------	------------	----------------------	----------------------

6. Ukupno obračunate uvozne dažbine na kompenzirajuće proizvode, u KM: _____						
7. Privremeno izvezena roba			8. Broj i datum carinske prijave za privremeno izvezenu robu:			

Red. br.	Trgovački naziv robe	Tarifna oznaka	Vrijednost	Stopa uvozne dažbine	Iznos uvozne dažbine
----------	----------------------	----------------	------------	----------------------	----------------------

9. Ukupno obračunate uvozne dažbine na privremeno izvezenu robu, u KM: _____						
10. Obračun carinskog duga						
Razlika obračunatih uvoznih dažbina (6-9)*: _____						
Porez na dodatu vrijednost: _____						
Akciza** _____						
Ukupno obračunati iznos za plaćanje***: _____						
11. Ovjera carinskog ureda Mjesto i datum _____			Potpis i sl. šifra carinskog službenika _____ M.P.			

* Član 147. Zakon o carinskoj politici BiH i član 22. ili 23. Uputstva o carinskom postupku vanjske obrade

** Član 34. Uputstva o carinskom postupku vanjske obrade

*** Obračunati iznos se upisuje u polje 47 IM 6 carinske prijave

VANJSKA OBRADA - obračun carinskog duga kod standardnog sistema razmjene bez prethodnog uvoza/uz prethodni uvoz*					
1. Carinski ured			2. Broj i datum odobrenja		
3. Nosilac odobrenja					
4. Zamjenski proizvodi			5. Broj i datum carinske prijave za zamjenske proizvode		

Red. br.	Trgovački naziv robe	Tarifna oznaka	Vrijednost	Stopa uvozne dažbine	Iznos uvozne dažbine
----------	----------------------	----------------	------------	----------------------	----------------------

6. Ukupno obračunate uvozne dažbine na zamjenske proizvode, u KM: _____					
7. Privremeno izvezena roba			8. Broj i datum carinske prijave za privremeno izvezenu robu:		

Red. br.	Trgovački naziv robe	Tarifna oznaka	Vrijednost	Stopa uvozne dažbine	Iznos uvozne dažbine
----------	----------------------	----------------	------------	----------------------	----------------------

9. Ukupno obračunate uvozne dažbine na bh. izvezenu robu, u KM: _____					
10. Obračun carinskog duga					
Uvozne dažbine na kompenzirajuće proizvode**:					
Razlika obračunatih uvoznih dažbina (6-9)**:					
Porez na dodatu vrijednost:					
Ukupno obračunati iznos za plaćanje****:					
11. Ovjera carinskog ureda					
Mjesto i datum			Potpis i sl. šifra carinskog službenika		
_____			_____		
			M.P.		

* Nepotrebno precrtati (ovisno koji sistem standardne razmjene je u pitanju)

** Član 147. Zakon o carinskoj politici BiH i član 30. Uputstva o carinskom postupku vanjske obrade

*** Član 32. Uputstva o carinskom postupku vanjske obrade

**** Obračunati iznos se upisuje u polje 47 IM 6 carinske prijave